

四庫全書

集部

欽定四庫全書

集部

唐文粹卷三十一至
三十二下

詳校官庶吉士臣謝恭銘

助教臣常循覆勘

總校官檢討臣何思鈞

校對官中書臣陸湘

謄錄監生臣許侯璋

欽定四庫全書

唐文粹卷三十一

宋 姚鉉 編

文甲

抱一十三首

帝王

踐祚四

唐高宗神堯皇帝受禪告南郊文

唐玄宗明皇帝受禪告南郊文

唐冊玄宗明皇帝文

賈魯

唐冊肅宗宣皇帝文

賈至

封禪二

唐高宗天皇大帝封禪文

唐玄宗明皇帝封禪文

祝壽一

唐德宗神武皇帝降誕日獻祝壽文

侯喜

告謝一

唐德宗神武皇帝平朱泚後告謝昊天上帝

文 陸贄

徽號二

唐武宗昭肅皇帝會昌二年上尊號玉冊文

李德裕

唐武宗昭肅皇帝會昌五年上尊號玉冊文

肆赦一

唐德宗神武皇帝奉天改年大赦文 陸贄

戒勵一

唐穆宗文惠皇帝戒勵風俗德音文

元稹

恕死一

唐德宗神武皇帝賜李納田悅王武俊鐵券

文

陸贄

唐高祖神堯皇帝受禪告南郊文

維有隋義寧二年五月乙巳朔二十日甲子皇帝臣某
敢昭告于昊天上帝伏以生人以來樹之司牧眷命所

矚謂之大寶歷數弗在罔或偷安故舜禹至公揖讓而興虞夏湯武兼濟干戈以定殷周事乃殊途功成一致後之創業咸取則焉臣恭承家慶世祿降及曰祖曰考累功累德賜履參墟建侯唐社地居戚里門號公宮丕緒隆基足為榮矣但有隋爽德屬壓大業饑饉師旅民胥怨咨謫見咎徵昭于玄鑒備聞卑聽所不忍言臣恭守晉陽馳心魏闕被首濡足拯溺救焚大舉義兵式寧區宇徵要荒之辮髮輯兆庶之離心誓以捐軀救茲人

命指陳喪亂期之又安有功繼世無希九五惟身與子
竭誠盡力率先鋒鏑誓以無貳載蒙弘誘克濟艱難電
掃風驅廓清天邑傳檄而定岷峨拱手而平關隴西戎
即敘東夷底定非啓非贊孰能茲速尊位世嫡嗣奉宗
隋勑力輔政無虧臣節值鼎祚云革天祿告移謳謌獄
訟聿來唐邸人符神瑞輻湊微躬遠近宅心華夷請命
少帝知期運已去大命有適遜位而禪若隋之初讓德
不嗣羣臣逼請今六宗乏祀七政未齊罪有所歸恐當

天譴請因吉日設壇告類祗畏上帝惠茲下民翼子謀
孫罔敢愆德則小則大無惑無違對越鴻休伏深慙懼
謹遣太尉某用薦告之禮瑞冊蒼璧香其明粢嘉蔬禋
祀于皇皇后帝明靈降享仍改義寧二年為武德元年
大赦天下

唐玄宗明皇帝受禪告南郊文

皇帝臣某敢以玄牡昭告于皇皇上帝上帝上皇厭理萬機
凝情太古釋茲重負與道優游宇宙不可以無君宗社

不可以無主恭惟歷數猥當虛薄懼忝帝位固辭不免
遂膺大禮以馭下人敬擇元日告類上帝惟神敷祐四
海永綏天極

唐冊玄宗明皇帝文

賈 魯

朕以寡昧虔奉鴻休本殊王季之賢早達延州之節昔
者聖歷已讓皇嗣之尊暨至神龍終辭太弟之授豈惟
衣冠所覩抑以兆庶咸知頃屬國步未夷時艱主幼大
業有綴旒之懼寶位深墜地之憂議迫公卿遂司契象

日慎一日以至于今一紀之勞動亦至矣萬邦之俗化
漸行矣將成夙願脫屣寰區昔堯之禪舜惟能是與舜
以命禹匪私其親神器之重允歸公授皇太子某有大
功于天地定阡危于社稷溫文既習聖敬日躋委之監
撫已移年歲時政益明庶功惟序朕之知子庶不負時
歷數在躬宜陟元后可令即皇帝位有司擇日授冊朕
方比跡洪古希風太皇神與化遊思與道合無為無事
豈不美歟王公百寮宜識朕意

唐冊肅宗宣皇帝文

賈至

維天寶十五載歲次丙申月戊子朔二十一日戊申太
上皇若曰咨爾元子某惟天為大惟人君則之順乃德
故舜禹揖讓而履皇極咈乃道故丹朱商均不能保鴻
業是以啓有患廸而夏嗣焉隋有亂紀而唐受焉五聖
之御寓皆以勤儉兢業日慎一日故能享祚長久垂慶
無窮洎于六葉恭位四海厭于勤倦緬慕汾陽將保靜
頤神思我烈祖玄元之道是用命爾元子當位嗣統於

戲爾有忠存之誠極于君父爾有友愛之義信于兄弟
爾有仁恕之行通乎神明爾有勩難之才彰于兆庶予
懋乃懿德嘉乃神武天之歷數在爾躬汝惟推誠禍亂
將興爾永清汝惟從諫宗社將興爾復寧佞言惟疵直
言惟師任賢弗貳去邪勿疑民非后孰治后非賢罔與
守邦欽哉慎乃有位無忝我祖宗之丕烈矣

唐高宗天皇大帝封禪文

嗣天子臣某敢告于昊天上帝有隋運屬顛危數窮

否塞生靈塗炭鼎祚淪亡高祖仗黃鉞而救黎元錫玄圭而拯沉溺太宗功宏鍊石定區宇於再麾業壯斷鼇飲滄海而一息臣忝奉餘緒恭承積慶遂得崑山寢燎炎海澄波雖乃業茂宗祧斯實降靈穹昊今謹告成東嶽歸功上玄大寶克隆鴻基永固凝薰萬姓陶化八紘

唐玄宗明皇帝封泰山玉牒文

有唐嗣天子臣某敢昭告于昊天上帝天啓李氏運興上德高祖太宗受命立基高宗升中六合殷盛中宗紹

復繼體不定上帝眷祐錫臣忠武底綏內難推戴聖父
恭承大寶十有三年欽若天意四海宴然封祀岱嶽謝
成于天子孫百祿蒼生受福

唐德宗神武皇帝誕節獻壽文 侯喜

維孟夏十四日天降皇帝之辰羣臣感覆燾之恩朝明
庭而獻萬壽者外盡四海罔有不至時臣亦幸在京師
無因緣以陪進竊自思念其感恩受賜與羣臣無異徒
以其身之卑賤至願莫伸如瘖者欲言瞽者欲趨乃作

降誕日獻壽文一篇恭置于康莊之衢其辭曰

未有人云則有彼天千變萬化兮道無常全高明運轉
兮與人下焉聖人法象兮則相永年自我自度兮祇畏
乾乾天受降福兮與人下焉臣今敢獻壽如天博厚配
天兮其誰則地含容光大兮無與二山澤藏寶兮富有
無既聖人體順兮不愛其利自我自誠兮其他至地至
地不測兮生物咸遂臣今敢獻富如地日出輝輝兮風
來薰薰甘露霖霖兮卿雲氛氲民曰五星兮生乎今辰

愛我則君何以慶兮無稱其恩榮華富貴兮子子孫孫
臣敢獻福兮如所聞

唐德宗神武皇帝平朱泚後告謝昊天上帝祝冊

文

陸贄

維貞元元年云云嗣天子臣敢昭告于昊天上帝顧惟
寡昧不克明道丕膺眷命俾作神主常恐獲戾上帝橫
災下民兢兢業業夙夜祇畏居位五祀德馨蔑聞皇靈
不歆是用大儆殷憂播蕩踰歷三時誠懼烈祖之耿光

墜而不耀側身思咎庶補將來上帝顧懷諄衷悔禍勦
兇慝之凌暴雪神人之憤耻舊物不改臣心載新茲乃
九廟遺休兆人介福以臣之責其何解焉間屬寇虞久
稽告謝今近郊甫定長至在辰謹以玉帛犧牲粢盛庶
品異憑裡燎式薦至誠太祖景皇帝配神作主尚饗

唐武宗昭肅皇帝會昌二年上尊號玉冊文

李德裕

維會昌二年歲次壬戌四月乙丑朔十四日戊寅攝太

尉光祿大夫守司空兼門下侍郎同中書門下平章事
臣德裕銀青光祿大夫守尚書左僕射兼中書侍郎同
中書門下平章事臣珙銀青光祿大夫守中書侍郎同
中書門下平章事臣李紳及文武百官金紫光祿大夫
檢校司徒兼太子太保臣僧儒等六千五百七十四人
言臣聞義皇首太古之號成湯顯神武之稱我高祖皇
王是憲尊名若古貽厥丕訓為存孫之法豈不善始善
述哉矧乃巨唐受命繼體承業理運將至大君以興昊

宮所以開至聖也。曩者明兩未定，帝華不協，捨脩傳聖，深惟至公先后，所以昭天命也。亦猶堯發于唐，侯文興於代，邸神明之祚，不其難哉！伏惟皇帝陛下，清明傳聖，光耿四海，玄德真隣，天休大賚，日角見表，氣志如神，爰初定命，正心理物，如辰居其極，而天下無邪矣。由是昭德塞違，尊賢遠佞，禹不自滿，成不自康，罔盤于田，不遁于色，自閏壺以施王教，由家道而刑國風，去比周，覈名實，擊權綱，擇聖德，修舊典，協誠質，訖嘉壇，款太一，進正

臣以端治表禮故老以求謹言遠無蔽獄近無留命祈
玄祖而膏雨降祀靈岳而嘉穀登省刑罰而蓬敷消發
倉廩而螽螟息去歲龍旂承祀大輅親郊捧玉瓚而一
獻光靈來格振金石而六變魄寶昭臨然猶古訓是學
緝熙于道天文炳煥雲漢其章溫恭敬遜承太任之教
和樂愷悌洽戚藩之心德風偃于羣黎威靈動乎絕域
又以敬養不逮于長樂昭配未升于禰宮每懷嗣徽蒸
蒸而慕所以奉若慈訓對若兩儀因心立制永錫其啟

寬底劉之罪興惻隱之仁迴霜收電為之反承及單于
慕義景付朔邊耀德戢兵謙臨是受至於備文物展國
容莫不先甲而布甘澤丁辰而廓陰翳和景晏溫御霽
網緼斯所謂神祇之心應矣天人之際交矣於是服冕
之士戴鶡之倫暨藩衛邦伯黃髮鮐背不謀而進曰陛
下玄默天睟輝光日新大矣存熙四極爰臻誠宜玉版
溫潤鏤鴻明之德神寶焜耀薦萬斯之年丕惟大典不
可解也陛下猶謙退固拒至于三四羣臣不已乃曰俞

哉夫徧覆包含之謂仁極深研幾之謂聖憲度著明之
謂文蠻夷震懾之謂武感而遂通之謂神無思不服之
謂孝臣等不勝大願謹奉玉寶上尊號曰仁聖文武至
神大孝皇帝伏惟陛下乾健不息謙尊而光樂戒其耽
禽戒其荒壽乃侔於殷宗俗乃厚于成康貽燕後昆受
福無疆臣德裕等誠歡誠躍頓首謹言

唐武宗昭肅皇帝會昌五年上尊號玉冊文

李德裕

維會昌五年歲次乙丑正月己酉朔一日己酉光祿大夫守太尉兼門下侍郎同中書門下平章事臣德裕光祿大夫守尚書左僕射兼門下侍郎同中書門下平章事臣悰朝議大夫檢校尚書右僕射兼中書門下平章事臣李讓夷朝議大夫守中書侍郎兼戶部尚書同中書門下平章事臣崔鉉及文武百官太中大夫太常卿臣孫簡等六千二百二人言臣聞在昔周宣獫狁內侵四牡薄伐以定王國則詩人大其功暨于漢宣北夷乖

亂呼韓慕義鄧支遠遁則簡策著其美惟此二代稱為
中興間者開成之末星孛如雲螟飛蔽天先帝感之黎
人懼焉乃受至聖遺大投艱迄茲成功厥有冥數伏惟
仁聖文武至神大孝皇帝表應龍翼粹含乾剛神全而
正氣凝宇定而天光發智燭千里動必察微心鏡萬機
物來斯應于是五材用四維張建中和之極綴前聖之
綱重樞機修法制刑御家之理無出壺之言銷讒邪遠
巧佞斥背公之黨退好徑之人內嚴體貌增堂陛之峻

外絕締交去輔車之勢古所謂受命於天惟舜獨也已
又曰一心定而萬物服唯陛下得之曩者北狄矜功耗
盡中國種類磨牙根抵封殖異術肺附縞衣如荼挾邪
作蠱侵淫守內倒懸不解百有餘年旣而龍祠埋滅携
國款塞質帝女戚海疆有狼顧平城之心鯨吞咸洛之
志爰命梟將塞旗刈旋兵鑒穹廬火烈荆榛颺蜀幙碎
輶輶六羸遜逃貴女生還剗滅妖迹剿除醜類故名王
結髮冠帶入臣堅昆稽首覲譯來獻而又姦臣放命二

紀陸梁據太山之固下窺洛邑通故絳之道旁晚近闕
樹其遺孽以竊兵柄議者僉曰精甲十萬積穀十年泉
魚不察湯網宜懸陛下雄斷霆聲羣疑冰釋揚清風而
掃雲鼓迅雷以破山任馮異則拔天井而震上黨仗吳
漢則發突騎而傾邯鄲壺關失險山東奪魄屬有戍邊
叛將竊發參墟人心搖蕩異議放肆陛下臨朝而言曰
二寇獲罪于天予所不捨未三旬而定晉陽纔暮年而
滅潞子不以金購稀將多降不勞師克粵首馳報非至

德感物孰能臻于此乎由是台宰百辟藩屏將帥上言
曰成伐東夷而肅慎來賀景翦七國而王室乃安莫不
始於武功終致刑措將以裡上帝薦祖宗宜受鴻名以
荅玄貺陛下猶謙遜而五讓之勤勤罔已乃屈已以俞
之雲漢為章所以昭法度也神明其德所以成教化也
巍巍乎有功帝堯之則也勤于大道玄祖之訓也臣等
不勝大願謹奉玉冊玉寶上尊號曰仁聖文武章天成
功神德明道大孝皇帝伏惟陛下不有其名以保其成

不德其功以戒其盈享殷宗之福致周道之平熙我王
度永振金聲臣德裕等誠歡誠躍頓首頓首謹言

唐德宗神武皇帝奉天改年大赦

陸贄

門下致理興化必在推誠忘已濟人不怙改過朕嗣服
丕構居臨萬邦失守宗祧越在草莽不念率德誠莫追
於旣往永言思咎期有復于將來明徵厥初以示天下
惟我烈祖邁德庇人致俗化于和平拯生靈于塗炭重

熙積慶垂二百年伊爾卿尹庶官洎億兆之衆代受亭育以迄于今功存于人澤及于後肆予小子獲纘鴻業懼德不嗣罔敢怠荒然以長於深宮之中暗于經國之務積習易溺居安忘危不知稼穡之艱難不察征伐之勞苦澤靡下究情不上通事既擁隔人情疑阻猶昧省已遂使興戎徵師四方轉運千里賦車籍馬遠近搔然行齎居送衆庶勞止或一日屢交鋒刃或連年不解甲胄祝奠乏主家室靡依死生流離怨氣凝結力役不息

田菜多荒暴命峻于誅求疲吐空于杼軸轉至溝壑離
去鄉閭邑里丘墟人煙斷絕天譴於上而朕不寤人愁
于下而朕不知馴致亂階變興都邑賊臣乘釁肆逆滔
天曾莫愧畏敢行凌逼萬品失序九廟震驚上辱於祖
宗下負于黎庶痛心覩貌罪實在余永言愧悼若墜淵
谷賴夫天地降祐人神叶謀將相竭誠爪牙宣力屏除
大盜載張皇維將弘永圖必希新命朕晨興夕惕唯念
前非乃者公卿百寮累抗章疏擬以徽號加于朕躬固

辭不獲俯遂輿論昨因循省良用矍然體陰陽不測之
謂神與天地合德之謂聖顧惟淺昧非所宜當文者所
以化成武者所以定亂今化之不被亂是用興豈可更
徇羣情苟應虛美重予不德祇益懷慙自今已後中外
所以書奏不得更稱聖神文武之號夫人情不常繫于
時化大道既隱亂獄滋豐朕既不能弘德導人又不能
一法齊衆苟設密網以罪非辜為之父母實增愧悼今
上元統歷獻歲發生宜革紀年之號式敷在宥之澤與

人更始用荅天休可大赉天下改建中五年為興元元年自正月一日昧爽已前大辟罪已下罪無輕重咸赦除之李希烈田悅王武俊李納等有以忠勞任膺將相有以勲舊繼守藩維朕撫馭乖方信誠靡著致令疑懼不自保安兵興累年海內搔擾皆由上失其道下懼其災朕實不君人則何罪屈已宏物予何愛焉庶懷引慝之誠以洽好生之德其李希烈田悅王武俊李納及所管將士官吏等一切並與洗滌各復爵位待之如初仍

即遣使分道宣諭朱泚雖與賊泚連坐路遠未必同謀朕方推至誠務欲弘貸如能效順亦與惟新其河南河北諸軍兵馬並宜各于本道自固封疆勿相侵軼朱泚大為不道棄義蔑恩反易天常盜竊名器暴犯陵寢所不忍言獲罪祖宗朕不敢赦其應被朱泚脅從將士官吏百姓及諸色人等有遭其扇誘有迫以兇威苟能自新理可矜宥但官軍未到京城已前能去逆效順及散歸本道者並從赦例原免一切不問天下左降官即與

量移近處已量移者更與量移流人配隸及藩鎮効力并緣罪犯與諸使驅使兼別救於諸州縣安置及得罪人家口未許歸者一切放還應先有痕累禁錮反逆緣坐承前恩赦所不該者並宜洗雪亡官失爵放歸勿齒者量加收叙人之行義或未必兼構大厦者方集于羣材建奇功者不限于常檢苟在適用則無棄人况黜免之徒沈鬱頗久朝過夕用勿拘常例諸軍諸道赴奉天及進收京城將士等或百戰摧敵或萬里勤王扞固金

城驅除大慙赴危難者其節著復社稷者其業崇我圖
爾功特加彛典錫名疇賦永永無窮宜並賜名奉天定
難功臣身有過犯遞減罪三等子孫有過犯遞減罪二等
當戶應有差科使役一切蠲免其功臣已後雖衰老疾
患不任軍旅當分糧賜並宜全給身死之後十年仍回
給家口其有食實封者子孫相繼代代無絕其餘叙錄
及功賞條件待收京日並准去年十月七日十一月十
四日敕處分諸道諸軍將士等久勤扞禦累著功勲方

鎮克寧惟爾之力其應在行營者並超三資與官仍賜
勲五轉不離鎮者依資與官賜勲三轉其累加勲爵許回
授周親内外文武官三品已上賜爵一級四品已下各
加一階仍並賜勲兩轉見危致命先哲攸貴掩骼埋胔
禮經所先雖効用而或殊在惻隱而何間諸道兵士有
死王事者各委所在州縣急遞送歸本管官為葬祭其
有因戰陣殺戮及擒獲伏辜暴骨原野者並委所在逐
近便收葬應緣流貶及犯罪未葬者並許其家各據本

官品以禮收葬自頃軍旅所給賦役繁興吏因為姦人
不堪命咨嗟怨苦道路無聊汔可小康與之休息其墾
陌及稅間架竹木茶漆榷鐵等諸色名目悉宜停罷京
畿之內屬此寇戎攻劫焚燒靡有寧室王師仰給人以
重勞特宜減放今年夏稅之半朕以兇醜犯闕遽用干
征爰度近郊息駕茲邑供儲克辦師旅攸寧式當褒旌
以志吾過其奉天宜升為赤縣百姓並給復五年尚德
者教化之所先求賢者邦家之大本永言茲道夢想增

懷而澆薄之風趨競不息幽棲之士寂寞無聞蓋誠所未孚故求之不至天下有隱居行義才德高遠晦跡丘園不求聞達者委所在長吏具名聞奏當備禮邀致諸色人中有賢良方正直言極諫及博通墳典達於教化并識洞韜畧堪任將帥者委常叅官及所在長吏聞薦天下孤老鰥寡惇獨不能自活者并委州縣長吏量事優卹其有年九十已上者刺史縣令就門存問義夫節婦孝子順孫旌表門閭終身勿事大兵之後內外耗竭

貶食省用宜自朕躬朕當節乘輿之服御絕宮室之華
飭率已師儉為天下先諸貢獻自非供宗廟軍國之用
一切並停應內外官有冗員及百司不急之資委中書
門下即商議條件停減奏聞布澤行賞抑惟舊章今以
餘孽未平帑藏空竭有乖慶賜深愧于懷赦書有所未
諗者所司類例條件聞奏

唐穆宗文惠皇帝戒勵風俗德音文

元 稹

敕朕聞昔者卿大夫相與讓于朝士庶人相與讓于齒
周成王刑措不用漢文帝耻言人過真理古也朕甚慕
焉中代以還爭端斯起掩抑其言則專蔽誘掖其說則
欺誣自非責實循名不能彰善癉惡故存宣必有敢告
乃下先武不以詭辭遽行語稱訕上之非律有匿名之
禁皆所以防三至之毀重兩造之明是以爵人于朝則
皆勸刑人于市則皆懼罪有歸而賞有事也未俗偷巧
內徃外剛卿大夫無進思盡忠之誠多退有後言之謗

士庶人無切磋琢磨之益多銷鑠浸潤之讒進則諛言
諛笑以相求退則羣居狎處以相識留中不出之請益
發其陰私公論不容之詞實生於明黨擢一官則曰恩
皆自我黜一職則曰事出他門比周之跡已彰尚矜介
恃由徑之蹤盡露自謂貞方居省寺者不能以勤恪莅
官而曰務求簡易提紀綱者不能以準繩檢下而曰密
奏風聞獻章疏者更相是非備顧問者互有憎愛苟非
秦鏡照膽堯羊觸邪時君聽之安可不惑參斷一謬俗

化益訛禍發齒牙言生枝葉率是道也朕甚憫焉我國
家貞觀開元同符三代風俗歸厚禮讓並行兵興已來
人散久矣姑欲導之以德不欲驅之以刑然而信或未
孚理有未至曾無耻格益用彫剝小則綜覈之權見侵
于下輦大則機密之重旁撓于薄徒尚念因而化之亦
既去其尤者而宰臣等懼其寢染未克澄清備引祖宗
之書願垂戒勵之詔遂申教告頗用殷勤各當自省厥
躬與我同庠于道凡百多士宜體朕懷

唐德宗神武皇帝賜李納田悅王武俊鐵券文

陸贄

維興元元年歲次甲子正月癸酉朔二日甲戌皇帝洛
爾具官某嗚呼君者所以撫人失於所撫則叛下者所
以奉上乖于所奉則刑各當其理德用不擾各違其分
亂于是生朕德薄化淺昧於君道罔知省已姑務責人
是以徵師徂征連歲靡息惟爾以誠志之不違反仄于
厥衷阻衆興戎結疊拒守豈非上失其所撫而下失于

所奉歟書曰萬方有罪罪在朕躬我實不德兆民非咎
俾廢其生業離其室家陷于困窮死於戰陣老病失養
孤惇靡依怨結蒼旻感傷和氣朕為人父母得不愧于
心哉晨興以思夕惕以悼粵自嗣位迄今六年天將悔
禍朕方覺悟爾亦知之衆心厭亂思以保安叶於朕懷
若膺符契非天地合德人神合謀將茂育羣生則何以
臻此朕是用上順天意俯從人心滌爾疵瑕復爾爵位
坦然靡阻君臣如初功載鼎彝名藏王府子孫代代為

國勲臣河山帶礪傳祚無絕朕方布大信承天子人若
食其言何以享國於戲其祇若明命用保無疆之休

唐文粹卷三十一

欽定四庫全書

唐文粹卷三十二

宋 姚鉉 編

文乙 總一十三首

帝王

謚冊二

唐中宗孝和皇帝謚冊文

蘇頌題

唐德宗神武皇帝謚冊文

權德輿

哀冊六

唐高祖神堯皇帝哀冊文

虞世南

唐太宗文武皇帝哀冊文

褚遂良

唐中宗孝和皇帝哀冊文

徐彥伯

唐睿宗玄真皇帝哀冊文

蘇頌

唐玄宗明皇帝哀冊文

王縉

唐憲宗章武皇帝哀冊文

令狐楚

后妃五

謚冊二

唐順宗莊憲皇后謚冊文

權德輿

唐懿宗元昭皇太后謚冊文

夏侯孜

哀冊三

唐太宗文德皇后哀冊文

虞世南

唐高宗則天皇后哀冊文

崔融

唐代宗貞懿皇后哀冊文

常袞

唐中宗孝和皇帝謚冊文

蘇頌

維景雲元年歲次庚戌十月戊寅朔十三日庚寅攝太尉銀青光祿大夫守戶部尚書上柱國宣城郡開國公臣姚珽等上議曰臣聞聖人極天下之順以象其物宜成天下之文以察其時變加於百姓之謂德刑於四方之謂風德也者動於神明風也者由於教化原始見則名合道先知終存義迹因形表其來尚矣伏惟大行應天神龍皇帝續武之命允文之基肇承於宥密以至乎緝熙若乃含青雲之符耀赤光之瑞履順而一夷險安

貞而再潛躍由是恭于三朝服茲四罪僕予之始祀夏
而無改舊物若帝之初遷周而有膺新命虔匹夫蒸蒸
之思愛於文母豫太帝庚庚之占友於王季既而三年
諒闇九族敦叙免喪問道穆乎天子之容退朝藏密怡
若家人之禮功收其成不以微刑濟其寬不以大譴詞
所不忤讒說所不入約躬而厚物盡下以推人翱翔乎
儒雅之林經啟於文章之囿不傷麋卵不夭卉木體仁
也行於蠻貊暨於陪臺施惠也酌中衢之樽不竭也陳

太廟之器不盈也故能百寶用四靈臻嘉禾神芝日獻
于府柔遠格懷荒至名駒巨象歲填于牧方採厚陵之
露華感而通夢遂揚昊壇之烟燎嚴以配尊然後心遊
絕冥神寄愷樂在雲臺之上希夷於真諦之門追汾水
之陽縹緲乎列仙之館豈圖變生氛沴凶邁霄極歛憑
玉以大漸顧遺弓而上仙所以函夏攀援人神哀戚龍
攢既啟鳥耘逾慕禮撤三獻北有因山之名法崇二言
南有至郊之議謹案謚法慈惠愛親博施備物皆曰孝

安人緝衆推賢讓能皆曰和夫孝以安親和以安人是則憲先生之典謨垂後裔之光烈者蓋天之所稱矣請上尊謚曰孝和皇帝廟曰中宗謹上

唐德宗神武皇帝謚冊文

權德輿

維永貞元年歲次乙酉月朔日孝孫嗣皇帝臣某伏惟大行皇帝德合天地作人父母纂承光明建用皇極昔在寶應制天下賦輿咸藩以大自魯疏雍師律既貞會陝收洛克燁威命廓開王塗是登上嗣乃宅丕后服藝

祖神宗之大烈有乾乾翼翼之至敬敷佑迪哲尊嚴懿
恭燭明四極發育萬類濯沐乎仁澤澄清乎理本巍巍
乎建中風聲與貞觀同符洎時有侵沴發生京轂省方
展義弘陰隲之功整旅致誅申震耀之令氛祲滅息侯
王軌道丕冒持載鏡清砥平然後明禋祀萬靈以接
翁受敷施九德咸事含弘亭毒以致其和博採虛受以
通其志政刑有箴宸宸有銘煥乎文明之化成也因時
創節象卦設樂薰然中和之被物也納嘉言於近侍輟

已行之詔疾讒口於宵人宥過失之罪去徽號而約已
正廟祧以尊祖九譯通道萬方來庭寶旅焯乎勲藉夷
歌陳於樂府霜露所墜車書大同順氣旁達天休滋至
慶霄輪囷德水清澈三辰秉陽以宣耀百嘉麗地而交
感飛走呈祥肖翹遂性在宥天下二十有七年夫文思
光被陶唐之盛也惜怛忠利虞帝之教也疊疊穆穆周
文之業也聰明神武漢祖之烈也窮古先之大律極帝
者之上儀方將扈升崇丘侍檢玉牒奄遺天命永棄萬

方億兆嗷嗷哀號靡訴顧惟冲昧懼忝孫謀君父有命
付茲神器虔恭貽訓感慕滋深今因山既建同軌畢至
一二元老宗工碩生考稱天之禮稽節惠之法式遵古
義敢薦大名謹遣太尉某謹奉冊上尊謚曰神武孝文
皇帝廟曰德宗伏惟聖靈昭格膺是典禮幽贊丕祉流
於無窮嗚呼哀哉

唐高祖神堯皇帝哀冊文

虞世南

維貞觀五年太歲云云即以明年某月日遷座于獻陵

禮也玄覽載籍逖聽皇王立德可久應運斯昌天基崇
峻帝系悠長虹暉降祉真氣呈祥葱衡朱黻熊軾龍常
契叶禎符誕生睿聖彤雲晝聚黃星夕映舒卷潛躍幾
深道性地載天臨日暉川鏡歷試藩岳風移俗正火德
云謝羣龍戰野蚩尤曜旗王良策馬拔山曠日滔天泯
夏蕩拒黎元阡危宗社提劍創業仗鉞專征風驅雲動
海運天行伐謀上畧制勝神兵尊王踐土復帝夷庚職
惟上相任隆羣辟六階已平四門咸闢殊物顯命彝章

典冊錫重介珪禮優秉石烟霞改色鏞管變音觀國受
命負宸君臨仁霑動植化感飛沈殷輅周冕禹迹堯心
削觚反撲抵壁藏金商俗未改遺氛阻亂沙塞虔劉伊
溼叛渙應變雷動秉機電斷十角雲消三川水泮漸以
文教致諸王道制禮和樂尊儒養老翠鳳棲梧丹魚在
藻水浮玄貝階榮朱草威加海外澤被區中要荒合軌
輶轔遐通沒羽沈浪飛輪駕風眷言釋負有懷高謝脩
爾櫟陽杳同姑射趨詩禮以承天稟義方以成化聿膺

景福方期永年玉几奄及金縢遂愆絕五日之晨省遽
千齡而上仙攀帷宸以孺慕抱劒舄以纏綿嗚呼哀哉
虔奉顧託式遵遺志指珠玉而不藏即陶甄以成器貽
儉德以為譽垂風聲於後嗣嗚呼哀哉永去天邑言遵
地肺背沃野之神臯越通川之清渭懷岐下之前迹眷
新豐之舊里笳哀噎以留思旖翩翩而顧指悲風急而
拱木吟平野晦而寒烟起嗚呼哀哉惟綴衣之如昨忽
馳光之莫駐亟時逝而節改俄涉新而履故野蒼蒼以

日衰歲凜凜而行暮感物悲於氣序銜哀踐於霜露泣
川水之逝波動商山之風樹躋厚地而無感仰高天而
何訴嗚呼哀哉曰聖與人誰前誰後炎昊無金石之固
勛華異松喬之壽孰厯世而長存唯令名之不朽矧玄
功與至德冠列辟而為首俾軼五而登三與天長而地
久嗚呼哀哉

唐太宗文武皇帝哀冊文

褚遂良

維貞觀二十三年歲次己酉五月甲辰朔二十六日己

已大行皇帝崩于翠微宮之含風殿旋殯于太極殿之
西階粵八月庚寅將遷座于昭陵禮也鳳管凝和龍帷
將曙溢化同軫綿區縞素哀子嗣皇帝某覽風樹而增
感攀銅池而拊膺迫宗祧之是寄傷往駕之無憑奠樽
盈而悲緒促靈景翳而愁雲興去劍滋遠清徽方闕爰
詔司存傳芳瓊字其辭曰

三微固祉五曜垂文光昭司牧對越唐勛族著玄牝家
傳縉雲高配于天一人有慶大行神武惟幾作聖良書

自得高文成性夙表餘雄先懷反正蒼兕爰發朱旗首
令衆瀛昏墊闕洛荒蕪妖傾地軸盜弄乾樞戎衣光啟
霸政宏謨天兵電掃月陣風驅蚩尤遞翦猋窾咸誅閭
位不度餘分興戾先收秦組次焚商袂轉圜上畧容光
下濟從邑垂仁賓門灑惠修風順軌凝圖奉睿青戾同
規玄珠協契發輝三五聲明遐裔泛野休兵靈臺偃革
升巖藏銳遵河奉璧學肆徐輪丘園散帛就日攸宜如
天在斯刑哀動植化美墳簞樂華曾舉禮葉旁垂沙塲

罄翦斗極咸羈狼山入囿潮渚歸池東旌若木西旆條
支龍鄉委質鳥服來儀大矣乘時悠哉利見文龜浮沼
應龍在淀涵露飛甘卿雲呈絢松莢望辛瑤華方薦仙
丹劒術星飛告變凝沴氣於升年掩璿暉於離殿嗚呼
哀哉商管初秋飛弦罷佾驚川悠緬宮車晏出大隧弗
營元龜獻吉展軫效駕端圭司日迫靈心於將餞痛皇
情其如失凝秋林於廣路遡悲風於長術經柏梁而徐
轉邁蘭池而從蹕聳輕旆之逶迤動邊笳之蕭瑟嗚呼

哀哉周營甫窆漢啟泉闡穀林搖落喬巖變衰平原淒
兮白日遠深渚澹兮秋雲飛覽銅雀而興慕傷鼎湖之
不歸嗚呼哀哉峻陵玄壤岵山窮路虛衛翻英輕馳委
素堯門閉而日慘義庭易而雲呀嗟厚德之長違仰高
天而攀慕嗚呼哀哉崇基永煥置業方昭遺風餘烈天
長地遙想神襟而騰茂縱史筆而揚翹籠嘉聲於日月
終有裕於唐堯嗚呼哀哉

唐中宗孝和皇帝哀冊文

徐彥伯

維景龍四年歲次庚戌六月辛巳朔二日壬午大行應
天神龍皇帝崩于神龍殿旋殯于太極殿之西階粵景
雲元年十一月二日乙酉將遷座于定陵禮也畫攢毀
帝雕輶肅輶縞紼霜迴丹旂雪引御窆臺之眇默背天
閣之崇峻皇帝瞻在原之隆響感聯夢之凋陰禮奠收
兮泣遺跡同氣訣兮悲聖心爰命下臣式揚鴻懿咨睿
烈於金牒刻明猷於玉字其詞曰

少典之子重華之孫珠聯寶系海浸昌源鳳鳥鳴國龍

蛟守門於鑠皇朕赫應成命青靄南浮彤雲北映掃刷
中寓光亨累聖欽若應天繼成前慶身佩星斗掌提曦
鏡克明克類允武允文就之如日望之如雲聲中律呂
辭合典墳道懋登庸榮膺繼體位擁青陸業移朱邸春
誦夏絃冬詩秋禮復子明辟固天攸啟鵬舉提象鸞飛
鑒乾蘿圖已御芝璽仍傳拱默當宁賡歌撫弦堯親更
睦媯德逾羶萬寶阜成四門光闢宵衣若厲道風猶尼
野接翹車殿橫儒席留連縞讌婉孌詞客潤洽泉魚恩

周弁毳毼譯驚輪要荒走幣削觚反撲寬刑薄稅俗富
京坻人忘疵癘帝圖廣運天意難誣旖旎祥錄張皇瑞
符仙芝抱砌神差搖厨龜負綈檢鱗銜斗樞孝思罔極
宗庸克賽親幸國陽式陳昭配翠輦容與蜺幃曖曖蒼
壁森羅明祗肅對玄精備典洪範盈疇將竦華蓋遙封
岱丘厭紫宙之阨僻追白雲之豫遊時若慕於喪妣道
空在於委裘嗚呼哀哉惟幾在辰枚卜違吉仍几虛座
綴衣空室景沴攝提悲纏昱日羣臣奉於末命天下悲

乎晏出嗚呼哀哉宗伯蒞典同軌赴辰龜謀入兆犀羈
移輜唱苦挽於香掖咽酸茹於曙旻彤階皛皛兮露驚
月玉座微微兮花掩塵嗚呼哀哉列綺城之哀仗引滋
橋之度愜朔颼急兮御道寒愁日晦兮雲郊晚駐石馬
之新塗下金天之舊坂見疎杏之原長覺深松之路遠
嗚呼哀哉伊昔睿詰先謀壽宮倚那我后復幸方中委
冠劒於泉窆保明靈於昊穹山有移兮海有變道無缺
兮聲無窮嗚呼哀哉

唐睿宗玄真皇帝哀冊文

蘇頌題

維開元四年歲次丙辰六月乙巳朔二十日甲子大行
睿宗大聖玄真皇帝崩於百福殿徙殯于太極殿之西
階粵十月朔某日將遷座于橋陵禮也素帟褰周青壺
警節儼無聲以虛衛陳有象而成列哀子開元神武皇
帝某追攀引繚眇擗司常悽庶物其涕迸感衆靈而影
彰睠茲鴻業欽若要道爰制近臣敢揚大寶其詞曰

高祖興唐垂其耿光睿宗誕慶紹我明命明命伊何重熙

累盛耿光伊何翊善傳聖在昔分瑞爰初剖符宅殷令
典居相宏圖宣哲觀藝祗庸服儒踐其成式納以嘉謨
否厯終泰傾維更紐予從代王子事周母退象藏密沖
襟釋負不為震驚自得謙受權乃復亨塞而自開固推
皇弟仍陟元台鳴牝構孽紛虹肆災颺馳神武電掃姦
回三讓天下載登宸極順夫毗心忘我帝力親譯修貢
親賢任職樂英已敷禮緯重繹宗廟率祀郊丘肇禋養
而迎夏芟以祈春靜默公道和平返淳知周翔泳功濟

陶鈞知子惟明從吾所尚陋伊祈之莫緒追齧缺而將
喪帝允執乎厥中皇遂崇於太上始授圖而觀察終脫
屣以清曠齋必閒館朝而別宮問安順色資孝弘風理
極兼受言承至公豈綴衣而憑几忽成鼎而號弓嗚呼
哀哉夢年罕驗顧是付囑屬神器其得所委靈心其何
欲增摧絕以孺慕竟厭時以去俗萬邦赴而同軌六遂
陳而帥屬外羣悲於縞素中不瘞於珠玉蜃輅迎轉龍
恍戒徂寒生紫殿曉發清都茹挽遲遲而徙靡旆旌戀

戀以威紆除櫟陽之御路指橋嶽之幽途禮既獻而三
撤神方寧而九虞遠遊通冠近嚴歸蹕因高而渭川盡
見馮下而秦京稍出積耘草以橫霜攢悲松以翳日鳴
呼哀哉粵義軒之建子姒兮今問傳其不已猗簡冊之
尊聖真兮鴻名冠而方始然後景雲藹華露滋揚至德
殷永思此天子之孝也臣何足以知之嗚呼哀哉

唐玄宗明皇帝哀冊文

王 縉

維寶應元年歲次壬寅建巳月五日玄宗至道大聖大

明孝皇帝崩于神龍殿旋殯于太極殿之西階粵以寶
應二年三月甲辰朔十一日將遷座于泰陵禮也象物
已設仙馭將飛空聞脫屣無復求衣孝孫皇帝親臨遣
奠意延晷刻向池綽而涕流想山園而心惻九天兮無
所一往兮何極感貽美於孫謀俾述事於祖德其詞曰
天厭隋亂中原無主人歸唐德上帝是輔以聖易暴興
文繼武義冠殷湯威包漢祖仰膺厯數光宅區宇惟皇
得一承乾嗣五赫哉厥初萬物斯覩景龍之際乾儀反

坤不利王室將開禍門呂危劉氏趙啄皇孫我獨仗劍
神期武賁上排閭闔俯掃軒轅不驚宗廟大造黎元為
而不有禮備尊尊乃奉睿宗爰受寶命問安侍膳純孝
至敬維城之年佐潞之政一著獻兆百靈翼聖躍馬截
流水不敢競潛龍變海池亦呈慶有開必先興王之盛
誥曰皇帝余倦于勤往繼丕業以順兆人辭之不可其
命惟新體乾之大法土之均臨之以日生之以春寒暑
彰信動植知仁九族既睦四門既賓天通之聖電斷之

神求賢箕箒就列搢紳謹言是聽庶政必親刑措兵戢
威加德馴戎狄讐竄塞不驚塵琛賁爭入來自無垠駕
鼓斥駿焚表棄珍風雨時若京坻相因師於上古思與
還淳然後制禮節焉作樂和焉北祠后土南郊上玄齋祭陵
廟位號山川教戰講武祈農籍田冕旒問俗旌旗幸邊文物
蔽地英聲動天鳳巢麟擾甘露醴泉九尾三脊朱草霏
烟繽紛効祉每歲且千道德洋溢乾坤交泰成功如何
登封于岱太平如何是時無外才藝餘美帝王之最學

究天人乙夜慙對文齊日月秋風靡逮推厯正元調律
平害札動雲落弦開葉碎揮琴陋虞教訶輕沛良辰可
賞聽政方退鐘鼓屢陳君臣高會巍巍蕩蕩四十餘載
巡省順動西南輿區命子出震繼明握圖長驅猛士累
翦封狐不失舊物言旋上都離宮就養壽酒多娛習道
久矣神仙遠乎嗚呼哀哉湖上鑄鼎海中祈藥忽乘紫
氣長遊碧落千門萬戶若無天兮寥廓八達九衢雖有
人兮寂寞淚為雨於宸極哭成雷於郊郭遺轍跡而徒

攀葬衣冠而可託同軌畢至初陵已開震鳳輦於仙仗
降龍輶於帝臺儼將行兮肅穆似有覩兮徘徊遇春城
兮如送望暮山兮謂來嗚呼哀哉壽原肇吉先天不違
接橋山之大隧營金阜之玄扉擁馳道兮皆往獨宮車
兮不歸厚夜兮藏晝終天兮戢輝文始遠極武餘英威
立德不朽至道惟微雖陰陽之與變化侔聖德兮安可
希超前古以作則遺後代以垂衣嗚呼哀哉

唐憲宗章武皇帝哀冊文

令狐楚

維元和十五年歲次庚子正月甲戌朔二十七日庚子
移殯於大內太極殿之西階粵五月十五日庚申遷座
于景陵禮也玉衡南指金波西落皓雪集其麻衣素雲
褰其綃幕柳宮龍動竹池魚躍兆庶雨泣於浩穰萬靈
風號於寥廓哀子嗣皇帝仰攀雕輦殷奠瓊筵哀無容
以觸地痛不返而終天仙仗徐進宸儀永隔降睿旨於
鸞臺揚聖功於鳳冊其詞曰

配天惟唐伊祁同光應道為帝玄元之系聖人有作孝

子善繼顯赫十朝總齊四裔執其大象司彼左契武烈
誕敷文明下濟出潛離隱或躍未融親則盤石封殊翦
桐承桃黃屋主鬯青宮禮樂盡在謳謌荐至軒皇倦勤
傳付神器太母侍養親臨寶位怡聲下色先意承志家
令敢言天子屏貴明明出震業業承乾其仁如山其智
如泉理析堅白學探幽玄揮毫霧動揆藻霞鮮所持者
儉所寶者賢刑靡不省賞無不延冕旒迎日珪璧祈年
涕謁宗廟臣朝昊天天縱神聖日躋孝敬鴻名再加寶

歷一定窮人屢賑名士交聘獸愛觸邪草憐指佞梯航
修貢鱗羽遂性河色呈符山聲告慶編書辨謗創殿思
政甘節必稱苦言終聽稜威之遠德政之盛霜雪憲章
雷風號令夏臺齒劒上黨納竄趙際宅心鄴中聽命誰
能去兵王者有征玉壘霧廓金陵鏡清狐鳴上蔡蟻聚
東平伏鎖就戮迴戈受烹始以上殺歸於好生恢恢不
失蕩蕩難名信及隱微道存溥博走馬斯郤昆蟲咸若
調其玉燭徇以木鐸混同車書遠頒正朔範金合土大

興大學清蹕鳴鑾將登高嶽四維既張五刃已藏蠻夷
戎羌敢不來王天下清淨朝廷樂康會冠劍以高晏戲
魚龍於廣場有嚴有翼無怠無荒俗皆臻於壽域人自
為於犧皇日出入兮安窮極雲飛揚兮無處所瑞方瞻
乎鳳來災忽聞於鸛語謂百年之可卜嗟九齡之不與
當凝旒而下臨奄脫屣以輕舉萬姓哀其考喪千官懷
其后撫封人猶祝於南山帝子已號於北渚嗚呼哀哉
披靈衣兮如在委仙珮兮若休建環海以靜寐謝鼎湖而

遠遊桂華朗兮高殿寂梧葉暗兮深宮愁驚同軌之
遽至咽長川而不流嗚呼哀哉威儀肅設文物前列酌
玉掌以宵奠駕金根而曉發出朱雀之正門背青鸞之
迴闕逶迤原野蒼茫日月去復去兮降堯階悲莫悲兮
臨禹穴嗚呼哀哉地開蒼谷天作豐山江海自流於泉
下城郭取象於人間高封馬鬣永秘龍顏鱗有逆兮曾
觸髯欲升兮尚攀朝百靈以肅肅遺八駿以閑閑陵植
柏兮未拱閣生苔兮已班嚴日宮而深閉藹雲幄以空

還與衆感於萬井結宸悲於九關嗚呼哀哉神行無方
乾健不息物皆被於聖澤人自迷於帝力巍乎高代之
行至矣動天之德後玄壤以長存冠蒼穹而罔極嗚呼
哀哉

唐順宗莊憲皇后謚冊文

權德輿

維元和十一年歲次甲申某月朔日哀子嗣皇帝臣某
伏惟大行皇太后柔明承天廣大法地齊二儀以發育
含萬物而化光靜專宅心謙儉約已塗山積厚淮水秉

靈四德交修六宮承式於德宗有逮事之孝敬於先皇
有輔佐之憂勤啟迪風徽儀形天下伏以永貞誥命脫
躡窠區乃居太上之尊乃正中宮之位顧茲冲眇上荷
劬勞自幼逮長稟邑姜之教勛繼體纂圖申長信之供
養率用慈訓施于理道母儀所被子惠所覃一紀于茲
萬方蒙福以載物之量包逮下之仁嗣任姒之徽音慕
黃老之清淨宜錫丕祉壽如岡陵昊蒼不憖艱棘俄及
追惟顧復創鉅感深銜恤茹荼叩心罔極今祔隅先遠

龜筮告吉順厚夷體幽嚴就路宰政卿尹與典禮之官
詢考古式詳稽謚法以周道章明未之或改敬形擬議
敢易大名謹遣攝太尉中書侍郎平章事臣裴度奉冊
上尊謚曰莊憲皇后伏惟皇靈降格淑聖幽贊昭配清
廟對越鴻休與大陰方祗永永無極嗚呼哀哉

唐懿宗元昭皇太后謚冊文
夏侯攷

維大中十三年歲次己卯九月癸丑朔二十七日己卯
嗣皇帝臣伏惟先太后體貞明以合天本懿粹而象地

發秀于外含章在中由潁川以表祥配沙麓而比德塗
山佐夏革野興商潛耀空蘊於方祇秘景莫觀於圓魄
卓爾絜操穆然凝輝欲報之德昊天罔極臣猥以沖昧
獲奉宗祧休惕哀榮慮墜大寶而天意允若人心克諧
惟懷永圖懼乖末命退省蒙固上感劬勞繫鏡無塵賜
衣有篋宸儀雖閔慈旨長存莫追蘭殿之晨昏空感椒
塗之霜露言成陰教行著國章逮事靡及於循陔終吉
徒哀於陟屺敢舉追崇之典寧申顧復之思伏惟舉位

以定名考謚以尊德所以揚茂烈傳休聲率由舊章竊
擬素範今禮官詳議庶僚稱贊備陳徽數克播令猷正
位號於瑤齋森禮容於金祀母儀無數廟貌有嚴將享
鴻休實憑玄祐謹遣攝太尉門下侍郎兼兵部尚書平章
事蕭鄴奉冊上尊謚曰元昭皇太后伏惟明靈昭格俯
鑒精誠時已逝而敬在六衣夜不陽而禮存三獻惟是
薦享與唐無疆嗚呼哀哉謹言

唐太宗文德皇后哀冊文

虞世南

維貞觀十年歲次甲申六月己未朔二十一日己卯大
行皇后崩於立政殿粵九月十日丁酉將遷座于昭陵
禮也殯宮夕啟靈輅曉前儼帷帟於空殿肅陞衛於靈
筵皇帝親臨宵載義深追遠瞻青蒲而永絕悼玉階之
莫返蜃輅將引犧樽已撤爰詔記言式揚徽烈其詞曰
二儀合德兩躡齊光列聖觀象邦家克昌猗歟華族英
靈降祉比齊越姜匹宋踰子育德高門騰芬素里體仁
將聖披圖閱史造舟為梁嗣徽前德履和思順自家形

國淑問不已柔風允塞紉組報勤璫珎垂則時逢昌聖
運屬休徵代邸膺歷唐侯嗣興紫宮並曜黃道階升化
宣風始業贊丕承比德無競凝神不測應物通理撫機
先識體備賢能暉無眇側績包九亂恩加八極性道希
夷言容莊敬戒奢處約懷沖履正景暖風暄霜嚴冰淨
領畧三古箴規六行源濬流遠時昌祚延國貞誕徽皇
支挺賢談高辯日學冠通玄慈訓所及懿德光前五福
云備千齡方永地紀絕維月輪韜景辰興不豫德音彌

整馬鬣無封鶴珠斯屏嗚呼哀哉異人神於倏忽變容
服於平生改清蹕以哀挽易朱旗以素旌昔照朝景響
環佩於曾城今冥永夜吟松栢於山楹嗚呼哀哉氣變
灰飛暑退寒襲烟觸樹而凝慘露分枝而垂泣聞哀鴈
之夕飛聽悲風之晚急仰雲霄而永慕慟陵寢其何及
嗚呼哀哉背玄武而北轅絕牽牛而橫度遂去去而逾
遠馬駸駸而不駐想渭水之貫都歎黃山之隱霧嗚呼
哀哉嗟人生之浮促若飄風之過牖牖何風而戛停人

何生而能久唯承天與載物邈慈深而德厚邁任姒之
高蹤播英聲而無朽嗚呼哀哉

唐高宗則天皇后哀冊文

崔融

維神龍元年歲次乙巳十一月朔二日云云大行則天
大聖皇后崩于洛陽宮之仙居殿旋殯于乾陵禮也祖
庭火燼攢宮月曉雲帶黼翣風牽絳旒儼天衛之蒼蒼
邈神儀之窅窅哀子嗣皇帝慕切充窮誠殷遣奠瞻象
服其如在攀龍車而不見閔慈範於長陵戢神輝於前

殿示人軌訓先王典則爰命史臣颺言聖德其詞曰

天生后稷飛鳥覆翼天護武王躍魚隕航施于成康武
子有光豐沛之疆河汾之陽異氣發祥聖母其昌穆穆
皇皇作令于唐至哉坤德沈潛剛克奇相月偃惠心泉
塞蘋藻惟勤紘紆是則訓自閨閭風行邦國七廟肅祇
六宮允釐中外和睦遐邇清夷家道以正王化之基皇
曰納輔后其謀咨謀咨攸俟皇用嘉止亦既顧命聿懷
代已聖后謙沖辭不獲已從宜稱制於斯為美仗義當

責亡軀濟厄神器權臨大運匪革宗祧永固寰宇奄宅
負衣肅清垂光赫洗洗我君四海無氛英才遠畧鴻
業大勲雷霆其武日月其文灑以甘露覆之慶雲制禮
作樂還淳返樸宗祀明堂崇儒太學四夷慕化九戎稟
朔沈璧大河泥金中嶽巍乎成功翕然嚮風乃復明辟
深惟至公歸閑於大庭之節受養於長樂之宮品彙胥
悅謳謠載隆鼎祚既穆珽樞已肅庶保太和長介景福
如何靡怙而降斯酷后弄孫其未掩人喪妣其焉速嗣

皇梓踊列辟扶服九親號咷萬姓荼毒嗚呼哀哉積憂
勞而不豫兮構氛沴而成災逢冰霜之慘烈兮見草木
之凋摧感大漸之將至兮遺惠言而不回付聖子其得
兮顧黎元曰念哉頒寵錫以留訣兮節禮數而送哀邈
終天而一去兮復何時而下來嗚呼哀哉光陰荏苒兮
氣緒回互泣盡冬霜兮悲生春露攢塗云啟兮同軌畢
赴湘川不從兮洪瑩蓋祔古則祀闕今也儀具嗚呼哀
哉夜漏盡兮晨輓發轉相風兮搖畫月厭河洛兮不臨

去蒿邱兮飄忽指咸陽之園寢歷長安之宮闕旋六馬
兮須期考三龜兮中歇嗚呼哀哉出國門兮夷由覽舊
物兮親憂備物森兮如在艮時闕兮莫留當赫曦之盛
夏宛蕭瑟之窮秋山隱隱兮崩裂水洄洄兮逆流嗚呼
哀哉挂旌旒於松烟即宮闈於夜泉下幽翳兮無日上
穹隆兮蓋天隧路嚴兮百靈拱殿園虛兮萬國旋如有
望而不至怨西陵之茫然嗚呼哀哉攝帝皇之高風欽
文母之餘懿時來存兮立極數往歸兮配地何通變之

有恒兮而始終之無愧惟聖慈之可法播徽音於後嗣
嗚呼哀哉

唐代宗貞懿皇后哀冊文

常哀

維大厯十年歲在辛卯十月辛酉朔六日丙寅貴妃獨
孤氏薨粵明日追謚曰貞懿皇后殯于殿之西階十三
年十月癸酉乃命門下侍郎同平章事常袞持節冊命
其月二十五日丁酉遷座于莊陵禮也素紗列位黼帟
周庭輅升玉綴軒軼珠櫺皇帝悼驚掖以追懷感麟趾

而增慟備百物以殷遣命六宮而哀送宗祝薦告司儀
降收爰詔侍臣紀垂鴻休其詞曰

祚祉悠久寵靈誕受元魏戚藩周隋帝后五侯迭興七
貴居右肇啟皇運光膺文母績女是因以綱大倫生知
陰教育我蒸人瑞雲呈彩瑤星降神聰明睿智婉麗貞
仁惟昔天鑒搜求才淑龍德在田葛覃于谷周姜胥宇
漢后推轂王業惟艱嬪風已穆繼文傳聖嗣徽克令不
曜其光乃終有慶祇奉園寢肅恭靈命越在哀莞聿追

孝敬文織絲組朱綠玄黃上供祭服以祀明堂法度有
節不待玕璫篇訓之制自盈縑緇叙我邦族風于天下
始於憂勤叶成王化慈厚諸女寵臨下嫁登賢進才勞
謙日夜服繒示儉脫簪申誠訪問後言讌遊夙退內和
羣娣動有矜誨外睦諸親泣辭封拜闕翟有日親蠶俟
時忽歸清漢言復方祇萬乘悼懷羣臣慕思玉衣追慶
金鈿同儀嗚呼哀哉去昭陽兮窅然乘雲駕兮何在人
代宛兮如舊炎涼倏兮已改翠葆森以成列素旗儼而

相待言從玉兆之貞永閼瑤華之彩別長秋之西苑過
望春兮南登招帝子于北渚從母后於東陵下上清兮
動金翠外無像兮中有憑合簫挽以攢咽結雲雨之淒
凝吾君感於幽期俯曾亭而望思慘殞媛以延佇極容
衛以盡時搖巾袂兮遠訣隔軒檻兮羣悲不復見兮迴
御輦傷如何兮軫睿慈下蘭皋兮背芷陽旌悠悠兮野
蒼蒼帶白花兮掩淚衣玄幘兮斷腸當盛明兮共樂忽
幽處以獨傷去故庭兮日遠即新宮矣夜長襪無文繡

之飾器無珠貝之藏蓋自我之立制刑有國之大方嗚呼哀哉見送往之空歸歎終焉之如此方士神兮是與非甘泉畫兮疑復似遺音在於玉瑱陳迹留於金祀獻萬壽兮無期存二南之餘美

唐文粹卷三十二

欽定四庫全書

唐文粹卷三十三上

宋 姚鉉 編

文丙 總九首

弔古三

許由先生廟酌文 柳識

弔夷齊文

書師曠廟文 袁皓

雷霆一

上天鼓文 程浩

軍政一

祭纛文 獨孤及

畏途一

招北客文

祛癘一

送窮文 段成式

責檄二

責龜文

王岳靈

檄曲江水伯文

樊鎬

許先生潁陽祠庭獻酌文

柳識

壬辰歲夏四月客有自洛東遊至先生遺廟而潁水古
風舊山歸然追懷古蹤慕美至道以時酒敬酌于靈既
酌既拜獻乎言曰

天清既能久地靜不能朽先生清淨天地全性出於胚

渾入於鴻蒙雲遊鳥還翦鬱和風當時帝道已半滋章
欲深大樸散於人未散於山林乃有巢父杳冥同心堯
齋公器退然見推遇聖相感不得不知耳雖濯於清流
道終播於無為所謂春膏時蒸朽葉自滋先生含德唐
堯發之潁陽之仁德曰大天下之祿利曰卑且聖王所
重者名器至人所重者感通推以大名義同讓終庶能
感俗道自為功任應會之偶然生垂後之清風人登雲
嶺多憶箕潁猗歟先生山水齊名茲焉遺廟萬古芬馨

弔夷齊文

洪河之東兮首陽穹崇側聞孤竹二子昔也餒在其中
偕隱胡為得仁而死青苔古木蒼雲秋水魂兮來何依
兮去何止掇澗溪之毛薦精誠而已初先生鴻逸中州
鸞伏西山顧薇蕨之離離歌唐虞之不還謂易暴兮文
武謂墨綰兮胡顏一吐兮忘飢若有謂兮于巖之闢豈
不以冠槩在於上履新處於下且曰一人之正位孰知
三聖之純嘏讓周之意不其然乎是以知先生所恤者

偏矣當昔夷羊在牧殷綱解結乾道息坤維絕鯨吞噬
兮鬼孽王奮厥武天意若曰覆昏暴資濬哲於是三老
歸而八百會一戎衣而九有截况乎旗錫黃鳥珪命赤
烏俾荷鉅橋之施俾申姜里之辜故能山立雨集電掃
風驅及下車也五刃不礪於武庫九駿伏轅於文途雖
二士不食而兆人其蘇既而溥天周土率土周人于嗟
先生逃將奚臻萬姓歸仰兮獨鬱乎方寸六合莽蕩兮
終跼乎一身雖忤時而過周終臣心而惻殷所以不食

其食求仁得仁然非一端事各其志若旁通以阜厥躬
應物以濟其利則焉有貞節之規各親之事靈乎靈乎
雖非與道而保生乃勗為臣之不二

書師曠廟文

袁皓

吟篴怨桐天其聲乎鏘石鏗金天其文乎擊革鳴絲天
其暢乎匏土之韻天其和乎天有至音寄斯八物先生
不生斯音鬱鬱先生既生斯音在律嗚呼先生之耳時
可求也先生之心不可得也天全樂乎先生之無神乎

愚固狂而不可據先生之有神乎愚堅誠而乞其圖先生之耳有神乎化為天下之耳先生之心有神乎化為天下之心者可以舒於今然後家家知舜琴

上天鼓文

程浩

雷車闐闐六合喧吼驟風雨於南極族星雲於北斗遑俄選魔東海以波蕩擺太山而瓜剖玉石至堅切如泥
潭松栢至勁粉為枯朽鼉皮擊考而魑魅睽暘龍領觝觸而鯨鯢奔走陶鑄造化之鑪而鴻毛萬像幹運乾坤

之柄而嬰孩羣有由是言則九鼎瑣細三山培塿萬仞
可以指揮蓬萊可以背負殊不測離蒼天之近遠當懼
驚魂在玄雲之幾重徒勞矯首及夫白日雨歇長虹霽
後列缺綏轡玄冥假手蓄殘怒之未洩聞餘音之良久
而小子之謬學敢獻疑於座右今若為善惡之宰主操
賞罰之休咎胡不扶持顏閔之羶行天閼跼蹐之首壽
罪一亂臣懲天下之凶醜旌一孝行激天下之悌友法
高懸於堯典刑丕試於周后何必霹靂潛霍之龍養育

吠堯之狗

祭轟文

獨孤及

天地不仁神明無親惟正是與若響之荅敢有象恭滔
天構釁稱亂國有明罰神其捨諸賊臣劉展假寵多難
敢包狼心竊發蠱毒將敷虐于我上下神祇使東溟揚
波羣動昏墊皇帝震怒按劍授鉞命我上將底天之伐
於是有虎牙鷹揚之臣蛇矛犀渠之羣橫行而東我伐
用張月羽雲旗以先啟行方將歷潯陽下南陵收京口

掃建業斯臬獍以繫鼓封鯨鯢于京觀俾萬里浪破三
象霧廓今以令月吉日整駕即路是用徼福于爾有神
惟神降衷尚弼予志敢告無靡旗無絳驂無汰輶無僨
車命五將護野萬靈並轂令天地氛祲望風掃除魑魅
魍魎罔不率俾莫我敢遏為神祇羞尚饗

招北客文

蜀之先曰蠶叢兮縱其目以稱王當周室凌頽兮亂無
紀綱洎乎杜宇從天而降鼃靈沂江而上相禪而帝據

有南國之九世蜀本南夷人也皆左其衽而椎其髻及
通乎秦也始於惠王之代五牛琢而秦女至一蛇死而
力士斃二江雙注羣山四蔽其地卑溼其風腴脆蠻貊
雜處滇越為隣地偏而兩儀不正寒薄而四氣不均花
葉再榮秋冬如春暮夜多雨朝旦多雲陽景罕開陰氣
恒昏以暑以溼為瘵為癘氣浥蟄以中人吾知重脰之
疾今將嬰爾身蜀之不可往北客歸去來兮

其東則有大江雲雲下絕地垠百谷相吞出於荆門突

怒吼劃附于太白渤溇礪礪會于滄溟跳噴浩淼上濺
飛鳥蹙縮盤渦下旋鼉鼉三峽兩壁亂峯如戟岷岷屹
岿瀕洞劃坼高于天霓雲外水積晝日無光其下黑窄
瞿塘無底淺處萬尺啼猿哀哀腸斷過客復有千歲老
蛟能變其身好飲人血化為婦人銜服靚粧遊于水濱
五月之間白帝之下洪濤塞峽不見灔澦翻天蹙地霆
吼雷怒亦有行舟突然而去人未及顧棹未及舉瞥見
陽臺不辨雲雨千里一歇日未移午須臾黑風暴起拔

樹震山石走砂飛波騰浪翻舟子失據摧檣折竿漩入
九泉沒而不還支體糜散蕩入石間水族呀呀拔刺爭
餐蜀之東不可往北客歸去來兮

其西則有高山萬重峻極屬天西有崑崙其峯相連日
月迴環闔于山顛巖崖盤嶽天壁負絕陽和不入陰氣
固閉千年增冰萬古積雪谿寒地坼谷凍石裂夏月草
枯春天木折蒼烟凝兮黑霧結人墮指兮馬傷骨江水
噴激迴盤紆縈棧壁綠雲鈎連相撐繩梁磔虛傍沓沓

冥下不見底空聞波聲過者矍然亡魂喪精復引一索
其名爲竿人懸半空度彼絕壑或如鳥兮或如獾倏往
還來幸不落或有豪猪千羣努鬣射人寒熊孔碩登樹
自擲見人則擘巨麋如牛脩角如劍餓虎爭肉吼怒闐
闐復有高崖墜石兮聲若雷之輶轟上敲下磕似火迸
兮滿山流星礮溪忽兮倒流林岸爲之顛傾碎騰狄與
過鳥駭木魅兮山精飛石壓人兮不可行西有犬戎與
此山通形貌類人言語不同龜廬隆穹毳裘蒙茸啜酪

啖肉持槍挾弓依草及泉務戰與攻其聲如犬其聚如蜂中國之人兮或流落於其中豈只掘鼠茹雪以取活終當鉹其足而累其胸泣漢月於西海思故鄉於北風蜀之西不可往北客歸去來兮

其南則有邛笮之關天設險艱少有平地連延長山橫亘廬江隔閩百蠻吁彼漢原上當漏天靡日不雨四時霧然其人如魚爰處其泉終年霖霖時復日出斨斨諸犬向天吠日人皆濕寢偏死腰疾復有陽山之路毒瘴

下凝白日無光其氣溲溲暑雨下濕黃茅上蒸南方之人兮不敢過豈止走獸踣兮飛鳥墮吾不知造化兮何知此方些蜀之南不可以往北客歸去來兮

其北則有劔山巉巉天鑿之門二壁豁訝高岸嶙峋上柱南斗傍鎮于坤下有長道北達于秦秦地神州中有聖人左右伊臯能致我君雙闕我我上覆慶雲千官鏘鏘朝于紫宸玉樓鳳凰金殿麒麟布德垂澤搜賢修文皇化欣欣煦然而春蜀之北不可以往北客歸去來兮

送窮文

段成式

予大中八年作留窮辭詞人謂予辭反之勝也至十三年客漢上復作送窮祝是年正之晦童稚戲為送窮舡判筒而槽比籥而閭細泉纒幅楮飾木偶家督被酒請禳窮將酹地歌舞窮予謂曰予送非嚙饒歷蹙循陰索隙臂葷瀹餅直脰涎瀝者非寒哭族憐敗衣網身惡覩牆間冷嘯淒辛者非嚇覲嗾巫欺癡嬈衰燼數楮泉擾狎狐狸者噫有才歟升窄腹腸噉喀幾童其筆燥心

汗滴以是而歿者去些有開卷數幅空心妨目襲經攻
史方寸日蹙以是而歿者去些有議古酌今左凌右浸
麓埴酒滲短淺不禁以是而歿者去些

責龜文

王岳靈

萬物之貴者人也人惟秀介蟲之智者龜也龜惟神隱
括無形神之謂也窮通有極秀之謂也况天之與人其
道甚遠不有以也將何遠焉則吉凶之祥假予以告變
化之象因子以明欲爰謀稽疑必先蔽昆命宜蠲割誘

慕展布心腹子無欺於人人有望於子成天下之亶亶
豈不率道與何諸呂弄權昭大橫於漢帝帝辛毒痛匪
告繇於周武揆惡之輕重也呂之惡不浮于辛量德之
休明也昌之德靡及於發子二其行誰不解體矣夫義
禮之與也信身之幹也何陳氏之母不疾而稱疾魯孫
之臣卜僭而告義喪於禮失其徒實繁吾不殫悉考夫
演卦繇者著也著之靈而不如子之長定妍媸者鏡也
鏡之明不如子之知銘乎竹帛萬代不泯奚起矛盾俾

吾反惑於古人孰謂子原天地之美達五行之理徒使
疏淪澡雪仰止蒙求曾莫之校何異乎曹丘生遇拒季
布善盼已虞國僑哉必以剝桂刻漆非材木所願拔鵲
裂冠非禽鳥所欲當潛伏齋澣違禍畧畧九江錫命其
可得乎豈不免氓之蚩蚩熒惑於耳目也

檄曲江水伯文

樊鑄

主張於地之血脉者豈不曰水伯乎爾自獸為身面為
人控牽兩龍窟宅百谷億有祀矣故數倫於元氣之液

弄權於坤輿之竅所云老而不死是謂之賊伊我謂爾
有是夫何者三載二月春服既成冠者五六人才子六
七人皆簸揚文精開闔武庫游嬉春晝汭江干興飛
壯心舞曳齒曹皆貸白龜之德不負赤鯉之本爾何為
陰發暴殄潛生毒痛簣禍堦於沙岸垣死府於花島如
數子者皆載垂堂之誠爾始若懸流三十仞跳沫四十
里固應尊而不親疊豈相及爾岸不崕岨流不唐突設
人所倚之福陷爾孔易之誘俾水銜貫堅之功舫聲之

如蝸蟾捫空呼天迄死不救倏恣化魚之惡誰下拜牛
之惠溺我國寶豈明時弃珠之泉沈彼綠舩實去夜藏
舟之壑與夫覩右山四耳之獸夢潁川一角之人置于
大江未匹斯甚使揭竿求父之子投牋請弟之兄奏空
篋傷妻之夫厲波濤徇壻之婦罹其凶害不忍荼毒並
告無辜于上下神祇行哭失聲於爾安乎爾今肆行賊
虐者豈不謂性與習成乎何哉曩者溺孫興公於後湖
之中淪炎帝女於東海之上化鼈於黃氏之母為魚於

歷陽之郡爾應恃以舊捷蔓其後圖殊不知事不欲數
數斯辱矣惡貫已滿天命誅之然今歷視爾自昔為過
之所或天涯或地岳起於侯甸之外且非輦轂之下豈
比今日俯九門臨四達使哀聲悲響上及聰聽爾誰欺
欺天乎然曲江者南峙仙閣北距靈宮足可效赤水產
黃帝之珠胡為殲蒼生竊司命之契況之人也皆編中
華俗游無何鄉所冀猛火烈山而莫焚大浸稽天而不
溺既遇舍爾省括之中縱使飯銜解漂之餌山經不沈

之木豈可免爾之圖乎茲中江自首創至于今時數千里子更代易主島流波耗纔可接腋於井蛙詎持頤於海鼈爾之所處豈不狹隘乎人之所賞豈有舳艫乎逮天寶載我皇恢土德以博之竇澤流以濬之積閏下之波瀾用濟川之舟楫豈不為幸於爾也爾何滿以致益凶以自斃使彼都人士自此之後懼爾同失神之海惡爾甚探手之湯匪徒歎爾盛事過自掇也雖悔可追然靈莫尊於君人時莫美於陽春君固愛人種德乘春宥

罪省囹圄去桎梏爾奚得恃宅無聞括守有曲襲不辜
於止獄之候繫餘殃於積慶之家僕謂數子叫天曹訴
地府黜爾主職在于斯須不然僕見欲上書於承明廬
徵菑近速周處擊劒長逐擘波深搜爾居遁逃則焦僥
東請長臂者灑灑之又於雄棠北使長股者憑踐之不
然邀離朱以視之命宋定以縛之然後調馬梅扇獸炭
是烹是醢以報東門爾儻若混空隱形和水匿象則使
牛曳蛇尾絕其本根縱逢山見彘毛終難必復矣僕亦

宜念五六日至于旬時恐爾有詞曰予不誠視成不令而行故矢在弦上垂而未發儻能易轍僕則既往不咎若為刻舟爾則何辭以對徐察爾變惟審圖之

唐文粹卷三十三上

欽定四庫全書

唐文粹卷三十三下

宋 姚鉉 編

文丁 總一十五首

傷悼 題哀辭後附

弔古戰場文 李華

弔國殤文 張說

弔九江驛碑材文 歐陽詹

悲剡溪古藤文

舒元興

弔韓弇沒胡中文

李觀

哀二良文

白居易

奠相國令狐公文

李商隱

祭韓侍郎文

李翱

祭獨孤常州文

崔祐甫

祀呂衡州化光文

柳宗元

為常州獨孤使君祭李員外文

梁肅

祭柳子厚文

韓愈

祭柳柳州文

皇甫湜

祭亡友故揚州功曹蕭公文

李華

歐陽生哀辭

韓愈

弔古戰場文

李華

浩浩乎平沙無垠，
負不見人。河水縈帶，
羣山糾紛。黯兮慘悴，
風悲日曛。蓬斷草枯，
凜若霜晨。鳥飛不下，
獸挺亡羣。亭長告余曰：
此古戰場也。常覆三軍，
往往鬼哭，天陰

則聞傷心哉秦歟漢歟將近代歟吾聞夫齊魏徭戍荆
韓召募萬里奔走連年暴露沙草晨牧河水夜渡地闊
天長不知歸路寄身鋒刃膈臆誰訴秦漢而還多事四
夷中州耗數無世無之古稱戎夏不抗王師文教失宣
武臣用奇奇兵有異於仁義王道迂闊而莫為嗚呼噫
嘻吾想夫北風振漠胡兵伺便主將驕敵期門受戰野
豎旄旗川迴組練法重心駭威尊命賤利鏃穿骨驚沙
入面主客相搏山川震眩聲拆江河勢崩雷電至若窮

陰凝閉凜冽海隅積雪沒脛堅冰在鬚鷺鳥休巢征馬
踟躕繒纊無溫墮指裂膚當此苦寒天假強胡憑凌殺
氣以相剪屠徑截輜重橫攻士卒都尉新降將軍復沒
屍填巨港之岸血滿長城之窟無貴無賤同為枯骨可
勝言哉鼓衰兮力盡矢竭兮弦絕白刃交兮寶刀折兩
軍蹙兮生死決降矣哉終身夷狄戰矣哉暴骨沙磧鳥
無聲兮山寂寂夜正長兮風淅淅魂魄結兮天沉沉鬼
神聚兮雲羃羃日光寒兮草短月色苦兮霜白傷心慘目

有如是耶吾聞之牧用趙卒大破林胡開地千里遁逃
匈奴漢傾天下財殫力痛任人而已其在多乎周逐獫
狁北至大原既城朔方全師而還飲至策勲和樂且閑
穆穆棣棣君臣之間秦起長城竟海為關荼毒生人萬
里朱殷漢繫匈奴雖得陰山枕骸徧野功不補患蒼蒼
蒸民誰無父母提攜捧負畏其不壽誰無兄弟如足如
手誰無夫婦如賓如友生也何思殺之何咎其存其沒
家莫聞知人或言將信將疑悁悁心目寢寐見之布

奠傾觴哭望天涯天地為愁草木悽悲弔祭不至精魂
無依必有凶年人其流離嗚呼噫嘻時耶命耶從古如
斯為之奈何守在四夷

弔國殤文

張說

北伐兮東胡邈邈陽兮孤竹偏師兮覆衆在崇山兮峽
谷露芄芄兮蔓草風蓁蓁兮拱木見馬血兮夜燃聞殤
魂兮雨哭君王按金鼓而氣憤撫珠鈴而淚滋橫萬里
兮抽恨弔羣山而寫悲懟凶將兮我辱悼勇夫之狄累

彼前鑒兮未遠何後來兮不追對死地兮出陣臨傷門
兮用師軍奪帥兮虹食壘車脫脇兮火焚旗有樂厲兮
愎矣無范宣兮愧之命窮進兮短兵錯膚迎刃兮血染
鏑旅殘潰兮棄組練山猶號兮谷餘戰殪原野兮奈何
違君親兮不見於戲何天命之奄忽伴仁義之治兵為
蠻夷之俘骨骸六校之飛將鎮五營之勁卒吾見出兮
不歸噫名存兮身沒

弔九江驛碑材文

歐陽詹

弔傷而有辭者也噫九江之驛碑其何興辭而弔歟斯碑之材昔大師魯國顏忠肅公所建祖亭之碑也公素負辭華代之銘誌多公之辭又好採異留名之致頃為湖州牧州產碑材石每使工琢之與辭兼行磨礱而成常心使用者不可勝數斯碑也終山之窮僻得之於自然趺本有龜護頂有螭雖不甚成而擎踴儼興如神如靈公神而珍之精選所處湖州無稱立罷守歸朝載而途卜出蘓臺入毗陵亦無稱立轉丹陽遊建業亦無稱

立次江州州南有湖湖東有山蛟奔螭引直到湖心頓
址之處則茂林峭石勢瓌氣勝非往時所睇而神祠曰
祖將軍廟在焉公覲其詭秀與碑材叶即以酒脯奠
其祖神出錢五萬造亭曰祖亭南香爐峯北潯陽城九
江為庭千艘歷階亭既就公製亭之文手勒斯碑而立
之公文為天下最書為天下最斯亭之地亦天下最庶
資三善加以斯碑之奇相持萬古而採異留名之致一
得也後典州吏於州之九江驛有修坏之勞狀其末績

乃取斯碑刻公之述寘已之述今為九江驛之碑焉予
旅遊江州稅于茲驛祠部員外郎鄭恕同之鄭與州將
嚴士良共為予說而俱以相示嗚呼先賤後貴世之常
也先貴後賤人之傷也以祖亭方九江驛則蘭室鮑肆
矣以魯公之文方今之文則牢醴糟糠矣以魯公之札
翰方今之札翰則錦綉枲麻矣以魯公之用方今之用
則諸夏夷狄矣痛哉斯碑出祖亭入九江驛失魯公之
文得人之文削魯公之札翰題人之札翰亡魯公之用

就人之用是去蘭室而居鮑肆捨牢醴而食糟糠脫錦綉而服枲麻黜諸夏而即夷狄可悲之甚者況我質天成必將可名魯公所以卜擇敬慎如彼而常人無良黷辱如此與夫有道而黥無罪而刖投四裔禦魑魅何以別也石不能言豈其無冤故弔之情違乃傷理悌乃冤人實有之物亦應然嗚呼子碑冤可予知陰隲子材豈曰無意必有以殊方頌以異與顏表勝以殊則明從吏居卑以異奚旌子產既授子不終致悠悠彼蒼何嗟及

矣美玉抵禽高冠藉足有類子碑先榮後辱繼世生哲
詎無賢兮將覲于斯將悼于斯庶滌所黷而復攸宜屹
屹子碑如神如祇人得以專天造何為其不然矣其不
然矣

悲剡谿古藤文

舒元興

剡谿上縣四五百里多古藤株枿逼土雖春入土脉他
植發活獨古藤氣候不覺絕盡生意予以為本乎地者
春到必動此藤亦本地地方春且有死色遂問谿上人

有道者云谿中多紙工刀斧斬伐無時擘剥皮膚以給其業噫藤雖植物者溫而榮寒而枯養而生殘而死亦將似有命於天地間今為紙工斬伐不得發生是天地氣力為人中傷致一物疾癘之若此異日過數十百郡洎東維西雍歷見書文者皆以剡紙相夸予寤曩見剡藤之死職止由此此過固不在紙工且今九牧士人自專言能見文章戶牖者其數與麻竹相多聽其語其自安重皆不啻握驪龍珠雖苟有曉寤者其倫甚寡不勝

衆者亦皆斂手無語勝衆者果自謂天之文章歸我遂輕傲聖人道使周南召南風骨折入於抑揚皇華中言偃卜子夏文學陷入於淫靡放蕩中比肩握管動盈數千百人數千百人筆下動行數千萬言不知其為謬誤日日以縱自然殘藤命易甚桑泉波波顏沓未見止息如此則綺文妄言輩誰非書剡紙者耶紙工嗜利曉夜斬藤以鬻之雖舉天下為剡谿猶不足以給况一剡谿者耶以此恐後之日不復有藤生於剡矣大抵人間費

用苟得著其理則不枉之道在則暴耗之過莫由橫及
於物物之資人亦有其時時其斬伐不為天閼予謂今
之錯為闕文者皆天閼剡谿藤之流也藤生有涯而錯
為文者無涯無涯之損物不直於剡藤而已予所以取
剡藤以寄其悲

弔韓侂沒胡中文

李觀

維唐貞元元年匈奴上款乞盟天子以其言誠乃命上
將往墀陰山而聽其誓言監察御史韓君載筆而隨焉

我上將仗九廟之信而首盟其間以戎人心為心戎乘我不虞而有詭謀我計無素成而姦以宿盟故勇者死奔者追而韓君為之擒矣嗚呼有備無患軍志也戎人安所暴其詐千慮一失聖人也韓君是以為之虜天其或者將用驚我非福戎也韓君為之擒其繫命歟五年於茲生死不尋謂之生豈復還期謂之死永永湮沈或曰死矣曾是切商弦之心絕國浩浩窮西極濱羌戎居之環視斷斷流沙無波陰山無春邊草不綠塞鴻不賓

秦有長城漢有遺人死者虜鬼生者虜臣哀哀韓君生死窮卒鬼能靈人能語君生其所君死其所今兩寂然心絲中阻君初奉役意氣西道白珪之貺唾掌可保激魯陽之勇歎典屬之老乃即於事不能畫奇從軍之籌君固職之可疑不疑固用阽危羌戎髣髴坐刃我師倉卒閤習血殷朔陸實死者痛非擒者悲夾谷之會不聞仲尼秦中九月黃葉始下長風西來烈烈飄瓦望君申弔亦懼來者已乎一魂時也命也

哀二良文

白居易

丞相隴西公出鎮于汴州軍司馬御史大夫陸長源實
左右之二年而軍用寧司空南陽公作藩于徐州軍副
使祠部員外郎鄭通誠實先後之十年而民用康暨十
五年春隴西薨浹辰而師亂大夫以直道及禍十六年
夏南陽薨翌日而難作員外以危行遇害惜乎大夫民
之望也員外國之良也咸克繫于身儉于家勤于邦又
申之以言行文學智謀政事故其歷要官參劇務如刀

劍發劓割而無滯如鐘磬在懸動而有聲識者以為異
時登天下股肱耳目之任必能修德秉哲紹復隴西南
陽之事業以藩輔王家嗚呼善人宜將鍾弈葉之慶而
不免及身之禍天乎報施之昧何其昧歟昔詩人有黃
鳥之章以哀三良不得其死今斯文亦以哀二良命其
篇云

伊大化之無形兮浩浩而茫茫中有禍牙兮若機之張
梁之亂兮陸受其毒徐之難兮鄭罹其殃惟善人兮邦

之紀綱邦之瘁兮正人先亡謂天之惡下民兮胡為乎
生此忠良謂天之愛下民兮胡為乎生此豺狼我欲階
冥冥問蒼蒼蒼蒼之不可問兮俾我心之盡傷悲夫而
今而後吾知夫天難忱而命靡常耶

奠相國令狐公文

李商隱

戊午歲丁未朔乙亥晦弟子玉谿李商隱叩頭哭奠故
相國贈司空彭陽公嗚呼昔夢飛塵從公車輪今夢山
阿送公哀歌古有從死今無奈何天平之年大刀長戟

將軍樽旁一人衣白十年忽然蛭宣甲化人譽公憐人
譖公罵公高如天愚卑如地脫蟪如蛇如氣之易愚調
京下公病梁山絕崖飛梁山行一千莫奏天子鐫辭墓
門臨絕丁寧託爾而存公此去耶禁其禁反不時歸鳳棲
原上新舊袞衣公先人亦贈司空有泉者路有夜者臺昔之去
者宜其在哉聖有夫子庶有伯夷浮魂沈魄公其與之
故山我我玉谿在中送公而歸一世蒿蓬嗚呼

祭韓侍郎文

李翱

嗚呼孔子云遠楊朱恣行孟軻拒之乃壞于成戎風混
華異學魁橫兄常辨之孔道昭明建武以還文卑質喪
氣萎體敗剝剝不讓儷花鬪葉顛倒相上及兄之為思
動鬼神撥去其華得其本根開合怪駭驅濤涌雲包劉
越羸並武同殷六經之風絕而復新學者有歸大變于
文兄之仕宦罔辭于難疏奏輒斥去而復遷昇黜不改
正言亟聞貞元十二兄作汴州我游自徐始得兄交視
我無能待予以友講文析道為益之厚二十九年不知

其久兄以疾休我病臥室三來視我笑語窮日何荒不
耕會之以一人心樂生皆惡言凶兄之在病則齊其終
順化以盡靡惑于中欲別千萬意如不窮臨喪大號決
裂肝胸老聃言壽死而不亡兄名之垂星斗之光我譔
兄行下干太常聲殫天地誰云不長喪車來東我刺廬
江君命有嚴不見兄喪遣使奠斚百酸攪腸音容若在
曷日而亡嗚呼哀哉嗚呼哀哉

祭獨孤常州文

崔祐甫

維大歷十二年歲次月日外從祖舅朝散大夫權知中
書舍人賜紫金魚袋崔祐甫遣表姝前鄧州南陽縣尉
李綜以清酌之奠祭于從外孫甥常州獨孤使君至之
之靈往矣至之此時何時空原拱木荆榛狐狸林風月
露以之增悲子之往也高格遠量秀氣茂姿亡兮何若
有兮誰對豈流蘇寓馬從之已爾嗚呼哀哉王事適我
政事一埤益我在籠而不能求其釋獨有懷君之淚臨
秋風而自滴平生相期聊復一叙一以豁胸中之憤氣

二以簡明靈而晤語吾與至之思弘道義自家刑國張
維舉墜吾與至之思敦交好平居琢磨遇死赴蹈吾與
至之思邁純德言為士準動有時則吾與至之思全高
節風雨如晦嘒嘒不輟吾與至之思闡斯文不俾臯契
獨暮華勛吾與至之談空覈玄夢蝶喻後去之蕭然吾
與至之期諸晚歲偃卧山樊同披薜荔舉其大較良難
名數念我交情千枝萬縷霜風掃葉或散或聚萬化紛
然同歸野土向之所務孰云其主嗚呼哀哉爛然澄醑

平昔共歡如何此奠取象於觀我思此飫子必吾劇目
想道周暫留徒御所可懷者徐生之絮

祀呂衡州化光文

柳宗元

維元和六年歲次辛卯八月癸亥朔友人守永州司馬
員外置同正員柳宗元謹遣書吏同曹家人襄兒奉清
酌庶羞之奠敬祭于呂八兄化光之靈嗚呼天乎君子何
厲天實仇之生人何罪天實讐之聰明正直行為君子
天則必速其死道德仁義志存生人天則必夭其身吾

固知蒼蒼之無信漠漠之無神今於化光之歿悲逾深而毒逾甚故復呼天以云云天乎痛哉堯舜之道至大以簡仲尼之文至幽以默千載紛爭或失或得倬乎吾兄獨取其直貫乎化始與道咸極推而下之法度不惑旁而肆之中和允塞道大藝備斯為全德而官止刺一州年不逾五十佐王之志沒而不立豈非循正直以召災好仁義以速咎者邪宗元幼雖好學未聞其道洎乎獲友君子乃知適於中庸削去邪雜顯陳真正為道不

謬兄實使然嗚呼積乎中不必施于外裕乎古不必諧
於今二事相勘從古至今至於化光最為太甚理行第
一尚非所長文章過人畧而不有夙志所蓄巍然可知
貪愚皆貴險狠皆老則化光之天厄反不榮歟所慟者
志不得行功不得施蚩蚩之氓不被化光之德庸庸之
俗不知化光之心斯言一出內若焚裂海內甚廣知者
幾人自友朋凋喪志業殆絕唯望化光伸其宏畧震耀
昌大興行於時使斯人徒知我所立今復往矣吾道息

矣雖其存者志亦死矣臨江大哭萬事已矣窮天之學
貫古之識一朝去此終復何適嗚呼化光今何為乎止
乎行乎昧乎明乎豈蕩而為大空與化無窮乎將結而
為光耀以助臨照乎豈為雨為露以澤下土乎將為雷
為霆以泄怨怒乎豈為鳳為麟為景星為卿雲以寓其
神乎將為金為錫為珪為璧以棲其魄乎豈復為賢人
以續其志乎將奮為神明以遂其義乎不然是昭昭者
其得已乎其不得已乎抑有知乎其無知乎彼且有知

其可使吾知之乎幽明茫然一慟腸斷嗚呼化光庶幾
聽之尚饗

為常州獨孤使君祭李員外文 梁肅

大歷九年五月日朝散大夫守常州刺史賜紫金魚袋
獨孤某謹以清酌之奠祭於故尚書吏部郎趙郡李遐
叔三兄之靈嗚呼疇昔之年接兄討論倚伏之數或尋
其源嘗謂仁人百祿滋蕃如何於兄斯道莫存嗚呼哀
哉惟兄孝友仁恕高明寬裕何德之茂何才之富粹氣

積中暢於四支發為斯文郁郁輝輝自五百年風雅凌
遲假手于兄鬱為宗師乃登憲闈直以舉之乃列諫臣
闕則補之玄宗季年戎狄內侮兄方就養劫在豺虎氣
霧濛濛薄汙我躬雷雨作解遠身于東帝曰孝哉可移
於忠名居右掖跡踐南宮丘明為耻玄晏方病清漳閒
卧樂道推命哀于大賢不嚮大年人之不幸天亦何言
在昔賈生見惡絳灌王佐之用不展於漢我之方行遭
世紛亂時運屯塞古今一貫嗚呼哀哉某以蒙蔽夙承

眷惠義均伯仲合若符契博約乎文章之間優游乎性命之際謂得攜手相期卒歲天其喪予兄則先逝嗚呼哀哉曩自朝列出持使節十年離別一旦存沒吳楚迢遞江山阻越不及歸賵仍乖執紼寢門一哀魂斷心絕恭承嘉命來牧于常總帳斯在哀何可忘鞠然二孤訴彼穹蒼孰謂遐叔與天茫茫魂兮歸來臨此一觴嗚呼哀哉

祭柳子厚文

韓愈

維年月韓愈謹以清酌庶羞之奠祭于亡友柳子厚之靈嗟嗟子厚而至然耶自古莫不然我又何嗟人之生世如夢一覺其間利害竟亦何校當其夢時有樂有悲及其既覺豈足追維凡物之生不願為材犧樽青黃乃木之災子之中棄天脫羈玉珮瓊琚大放厥辭富貴無能磨滅誰紀子之自著表表愈偉不善為斲血指汗顏巧匠旁觀縮手袖間子之文章而不用世乃令吾徒掌帝之制子之視人自以無前一斥不復羣飛刺天嗟

嗟子厚今有今亡臨絕之音一何琅琅徧告諸友以寄
厥子不鄙謂余亦託以死凡今之交觀世厚薄余豈可
保能承子託非我知子子實命我猶有鬼神弗敢遺墮
念子永歸無復來期設祭棺前矢心以辭嗚呼哀哉尚
饗

祭柳柳州文

皇甫湜

嗚呼柳州秀氣孤稟弱冠游學聲華藉甚肆意文章秋
濤瑞錦吹迴蟲濫王風凜凜連收甲科驟閱班品青衿

搢紳屬目歛衽公卿之祿若在倉廩至駿難馭太白易
慘華鐘始撞一頓聲寢梧山恨望桂水愁飲鬱鬱羣議
悠悠積稔竟奄荒瘴遂絕羈枕嗚呼柳州命實在天賢
不必貴壽不必賢雖聖與神無如命何自古以然相視
咨嗟歸葬秦原即路江臯聲容蔑然相嘆增勞惟有令
名日遠日高式薦誠辭以佐羞醪尚饗

祭亡友故楊州功曹蕭公文 李華

乾元三年二月十日孤子李華以清酌之奠致祭于亡

友故揚州功曹蘭陵蕭公之靈於乎茂挺平生相知情
體如一歲月之別俄成古今天乎喪予此痛何極華釁
罰深重艱棘所鍾殊方永慕觸目號裂孤窮易感況哭
故人以足下才惟挺生名蓋天下道孤命屈淪阨終身
避亂全絜忠也冒危遷祔孝也有王佐之才先師之訓
而歿於道路何負於天天乎痛哉華疇昔之歲幸忝周
旋足下不棄愚劣一言契合古稱管鮑今則蕭李有過
必規無文不講知名當世實賴吾人循環往復何日忘

此而況泣血千里羈旅相依聞此一哀心骨皆斷痛之
至者言不能宣是欲寄辭祇益填塞茂挺茂挺君其降
靈尚饗

歐陽生哀辭

韓愈

歐陽詹世居閩越自詹已上皆為閩越官至州佐縣令
者累累有焉閩越地肥衍有山泉禽魚之樂雖有長材
秀民通文書吏事與上國齒者未嘗肯出仕今上初故
宰相常袞為福建諸州觀察使治其地袞以文辭進有

名於時又作大官臨莅其民鄉縣小民有能誦書作文
辭者袞親與之為主客之禮觀遊宴饗必召與之時未
幾皆化翕然詹于時獨秀出袞加敬愛諸生皆推服閩
越之人舉進士繇詹始建中貞元間余就食江南未接
人事往往聞詹名閭巷間詹之稱於江南也久貞元三
年余始至京師舉進士聞詹名尤甚八年春遂與詹文
辭同考試登第始相識自後詹歸閩中余或在京師他
處不見詹久者唯詹歸閩中為然其他時與詹離率不

歷歲移時則必合必兩忘其所趨久然後去故余與
詹相知為深詹事父母盡孝道仁於妻子於朋友義以誠氣
醇以方容貌嶷嶷然其燕私善謔以世其文章切深喜往
復善自道讀其書知其於慈孝最隆也十五年冬余以
徐州從事朝正于京師詹為國子監四門助教將率其
徒伏闕下舉余為博士會監有獄不果上觀其心有益
於余將忘其身之賤而為之也嗚呼詹今其死矣詹閩
越人也父母老矣捨朝夕之養以來京師其心將以有

得於是而歸為父母榮也雖其父母之心亦皆然詹在側雖無離憂其志不樂也詹在京師雖有離憂其志樂也若詹者所謂以志養志者歟詹雖未得位其名聲流於人人其德行信於友朋雖詹與其父母皆可無憾也詹之事業文章李翱既為之傳故作哀辭以舒余哀以傳於後以遺其父母而解其悲哀以卒詹志云

求仕與友兮遠違其鄉父母之命兮予奉以行友則既獲兮祿實不豐以志為養兮何有牛羊事實既修兮名


譽又光父母欣欣兮常若在傍命雖云短兮其存者長
終要必死兮願不永傷友朋視疾兮藥物甚良飲食孔
時兮所欲無妨壽命不齊兮人道之常在側與遠兮非
有不同山川阻深兮魂魄流行祀祭則及兮勿謂不通
哭泣無益兮抑哀自強推生知死兮以慰孝誠嗚呼哀
哉兮是亦難忘

題哀辭後

愈性不喜書自為此文惟自書兩通其一通遺清河崔

羣羣與余皆歐陽生友也哀生之不得位而死哭之過時而悲其一通今書以遺彭城劉君伉君喜古文以吾所為合於古詣吾廬而來請者八九至而其色不怨志益堅凡愈之為此文蓋哀歐陽生之不顯榮於前又懼其泯滅於後也今劉君之請未必知歐陽生其志在古文耳雖然愈之為古文豈獨取其句讀不類於今者耶思古人而不得見學古道則欲兼通其辭通其辭者本志乎古道者也古之道不苟譽毀於人劉君好其辭則

其知歐陽生也無惑焉



唐文粹卷三十三下